

## RM45 bilion untuk 4,000 projek pembangunan

PUTRAJAYA - Kerajaan akan membelanjakan sebanyak RM45 bilion bagi 4,000 projek pembangunan pada tahun ini dan berikutnya.

Menteri Hal Ehwal Ekonomi, Datuk Seri Mohamed Azmin Ali berkata, jumlah peruntukan itu turut melibatkan pemuliharaan beberapa projek berskala besar sekali gus menjadi pemacu kepada pembangunan ekonomi negara.

"Bagi memastikan pertumbuhan yang teguh dan mapan, usaha meningkatkan pelaburan langsung asing (FDI) perlulah bergerak seiring dengan pelaburan domestik.

"E-dagang perlu diberi penekanan untuk memacu ekonomi.

"Secara kolektif, usaha



MOHAMED AZMIN

ini akan menambah nilai substantif kepada ekonomi kita terutama dalam mencipta peluang pekerjaan dan penjana kekayaan," katanya menerusi rakaman video ucapan pelancaran Persidangan Penyediaan Rancangan Malaysia Ke-12, 2021-2025 di sini semalam.

Mohamed Azmin berkata, dalam usaha itu kerajaan telah mengurangkan

beban pengawal seliaan dengan menyingkirkan *non-tariff measure* (NTM).

"Sehingga 2018, kerajaan telah mengkaji semula 668 NTM di bawah enam kementerian yang mempunyai anggaran kos pematuhan berpotensi sebanyak RM2.96 bilion dengan penjimatan kos sebanyak RM739 juta," katanya.

Sementara itu, Setiausaha Kementerian Hal Ehwal Ekonomi, Datuk Saiful Anuar Lebai Hussen berkata, pembangunan projek-projek tersebut akan dilaksanakan oleh semua kementerian.

"Projek ini kita luluskan menggunakan peruntukan pembangunan bagi tahun ini," katanya yang hadir mewakili kementerian beliau.